

UNIVERSITI SAINS MALAYSIA

Peperiksaan Semester Kedua
Sidang 1986/87

YMP 204 - Kewartawanan I

Tarikh: 10 April 1987

Masa: 2.45 ptg. - 5.45 ptg.
(3 jam)

Jawab SEMUA (TIGA) soalan.

1. Baca petikan ucapan Menteri Kewangan yang dilampirkan. Cari tema dan tuliskan satu laporan berita mengenainya. (50%)

2. SAMA ADA

Bincangkan pindaan Akta Rahsia Rasmi dan kesannya ke atas akhbar di Malaysia. (25%)

ATAU

Apakah etika dan perlukah etika bagi wartawan-wartawan memandangkan wujudnya undang-undang yang begitu ketat terhadap proses pengutipan dan penyiaran berita dan maklumat. (25%)

3. SAMA ADA

Apakah yang dimaksudkan dengan kewartawanan pembangunan? Nyatakan kelemahan dan kekuatan yang terdapat pada akhbar di Malaysia mengenai kewartawanan pembangunan (adakah mereka memainkan peranan ini? Apakah yang mereka harus lakukan?). (25%)

ATAU

Dr Mahathir satu ketika dahulu menyatakan bahawa hanya kerajaan dapat mewakili pendirian dan pendapat rakyat kerana kerajaan dipilih oleh rakyat. Akhbar tidak dipilih oleh rakyat dan oleh itu tidak boleh mengakui diri mereka sebagai, "suara rakyat." Bincangkan pandangan Perdana Menteri ini dari segi tanggungjawab akhbar di Malaysia. (25%)

LAMPIRAN

ZAMAN MENCABAR: KITA MESTI BERANI DAN TEGAS

(Petikan ucapan belanjawan
Menteri Kewangan di Dewan Rakyat)

Semenjak saya membentangkan Belanjawan 1986 tahun lalu, kedudukan ekonomi negara telah menjadi lebih buruk disebabkan oleh perkembangan ekonomi dunia yang tidak menggalakkan. Rakyat Malaysia yang begitu biasa dengan taraf hidup yang agak tinggi, sekarang ini perlu menerima hakikat bahawa keadaan ekonomi adalah amat mencabar. Harga-harga barangan utama telah turun dengan banyak. Kebanyakan dari harga-harga ini tidak akan mencapai paras setinggi yang pernah diperolehi di tahun-tahun yang lalu.

Oleh yang demikian, kita perlu mengambil langkah-langkah yang berani dan tegas untuk menghadapi cabaran-cabaran ini dan menyusun semula ekonomi negara. Sebahagian daripada langkah-langkah ini telahpun dilaksanakan, tetapi beberapa langkah baru perlu diambil untuk memulihkan semula ekonomi, dan mengukuhkan lagi kedudukan kewangan negara. Setiap golongan rakyat mestilah bersedia untuk berkorban, demi memperkukuh dan memulihkan ekonomi negara.

Sebelum menghuraikan prestasi ekonomi negara, saya terlebih dahulu menyentuh beberapa perkembangan dalam ekonomi antarabangsa yang mempunyai kesan ke atas negara kita.

Ekonomi Antarabangsa

Keadaan ekonomi antarabangsa kian tidak menentu. Pertumbuhan ekonomi dunia masih tidak menggalakkan dan ini akan memberi kesan buruk Malaysia. Pertumbuhan sebenar di negara-negara perindustrian dijangka merosot kepada 2.8 peratus tahun ini berbanding dengan tiga peratus pada tahun 1985.

Perdagangan dunia adalah amat penting bagi pertumbuhan negara-negara membangun. Pada tahun ini, perdagangan dunia dijangka berkembang dengan sederhana, iaitu pada kadar 3.5 peratus. Kadar ini mungkin meningkat sedikit sahaja pada tahun 1987.

...2/-

Selain dari itu, beberapa negara perindustrian akan terus mengalami defisit akaun semasa yang besar. Defisit yang besar ini serta kadar pengganguran yang tinggi telah mendorong negara-negara perindustrian meningkatkan perlindungan terhadap industri-industri mereka yang lemah dan kurang cekap. Oleh itu peluang negara-negara membangun untuk meningkat eksport mereka adalah amat terhad.

Negara-negara maju belum lagi mencapai persetujuan untuk menyeleraskan dasar-dasar ekonomi mereka bagi menggalakkan pertumbuhan dan meningkatkan perdagangan antarabangsa. Sekiranya beberapa buah negara tersebut tidak melaksanakan dasar yang berkesan untuk menggalakkan kegiatan ekonomi dalam negeri, pertumbuhan ekonomi mereka dijangka akan berada pada tahap yang sederhana sahaja dalam beberapa tahun yang akan datang.

Suasana ekonomi antarabangsa yang semakin buruk telah menjejaskan pertumbuhan ekonomi hampir semua negara-negara membangun. Ekonomi negara-negara tersebut telah terjejas oleh kejatuhan harga minyak dan barangan-barangan utama yang lain, pengaliran masuk modal yang rendah, dan pertumbuhan perdagangan dunia yang perlahan. Negara-negara maju dijangka mendapat keuntungan lebih dari AS\$70 ribu juta berikutan dari kejatuhan harga minyak dan barangan utama.

Walaupun jumlah eksport negara-negara membangun dijangka meningkat sebanyak 5.9 peratus dalam tahun 1986, nilai eksport negara-negara tersebut akan merosot sebanyak 8.2 peratus. Pada masa yang sama, harga import barang-barang perkilangan semakin naik. Oleh itu, defisit akaun semasa negara-negara membangun dijangka meningkat dari AS\$19,000 juta dalam tahun 1985 kepada AS\$58,000 juta dalam tahun 1986. Ini bermakna defisit akaun semasa akan meningkat sebanyak 39 ribu juta dolar.

Hutang Luar

Kedudukan hutang luar negeri negara-negara membangun juga masih berada pada paras yang membimbangkan. Jumlah hutang meningkat dari AS\$914,000 juta dalam tahun 1985 kepada AS\$966,000 juta dalam tahun 1986. Nisbah khidmat hutang pula akan merosot dari 23 peratus dari eksport dalam tahun 1985 kepada 26 peratus pada tahun ini.

Seperti juga ekonomi negara-negara membangun yang lain, ekonomi Malaysia turut terjejas oleh perkembangan ekonomi antarabangsa. Ahli-Ahli Yang Berhormat mungkin masih ingat bahawa dalam Ucapan Belanjawan tahun 1986, saya telah meramalkan ekonomi negara akan berkembang sebanyak 5.2 peratus dalam tahun 1985. Malangnya, sektor luar negeri telah menjadi lebih lemah dari yang dijangkakan.

...3/-

Dengan itu, kadar Keluaran Dalam Negara Kasar atau KDNK telah berkurangan sebanyak satu peratus dalam tahun 1985. Kejatuhan pengeluaran dalam 1985 disebabkan oleh kemerosotan besar dalam pengeluaran sektor perkilangan berikutan dari permintaan luar negeri yang lembap serta prestasi sektor pembinaan dan perlombongan yang tidak menggalakkan.

Bagi tahun 1986, KDNK sebenar dijangka tumbuh pada kadar 0.5 peratus sahaja. Dalam beberapa tahun yang akan datang, kita terpaksa bersedia untuk menghadapi pertumbuhan ekonomi yang rendah.

Harga-harga barangan utama kita telah jatuh ke paras yang paling rendah. Harga purata minyak mentah dijangka kira-kira AS\$15 setong dalam tahun 1986 berbanding dengan AS\$28 setong dalam tahun 1985. Harga minyak sawit juga, telah jatuh dengan banyaknya dan dijangka berada pada paras purata \$470 se tan metrik dalam tahun 1986.

Pada paras harga ini, pengeluar-pengeluar kelapa sawit, terutama sekali pekebun kecil akan mengalami kerugian. Di antara barangan utama kita, hanya harga getah sahaja yang masih berada pada paras yang memuaskan. Berikutan dari kemerosotan pendapatan eksport barangan utama, pendapatan eksport negara dijangka berkurangan sebanyak \$5,900 juta dalam tahun 1986.

Keluaran Negara Kasar atau KNK dalam harga semasa akan jatuh sebanyak 8.1 peratus dalam tahun 1986 setelah turun sebanyak 3.2 peratus dalam tahun 1985. Ini disebabkan oleh kemerosotan dalam pendapatan dari eksport. Dengan itu, pendapatan per kapita dijangka turun sebanyak 15.7 peratus kepada \$4,094. Sekiranya pendapatan per kapita ini dinilai dalam mata wang dolar Amerika, ianya telah merosot sebanyak 23 peratus, atau dari AS\$2,067 kepada AS\$1,587 dolar. Jika dinilai dalam mata wang Yen, kemerosotan ini adalah lebih ketara lagi, iaitu sebanyak 46 peratus iaitu dari 490,700 Yen kepada 267,600 Yen. Apa yang menyedihkan kita ialah walaupun pengeluaran bertambah, perolehan daripada eksport semakin rendah.

Kemerosotan dalam pendapatan eksport juga akan menyebabkan defisit akaun semasa Imbangan Pembayaran yang lebih besar iaitu \$3,237 juta berbanding dengan 1,795 juta dalam tahun 1985. Jumlah defisit ini merupakan 4.9 peratus dari KNK berbanding dengan 2.5 peratus pada tahun lepas. Import telah berkurangan berikutan dari pertumbuhan ekonomi yang perlahan serta tindakan-tindakan tegas yang diambil sejak tahun 1982 untuk mengurangkan perbelanjaan Kerajaan.

...4/-

Kadar Inflasi Rendah

Walau bagaimanapun, pengurangan import adalah lebih kecil berbanding dengan kejatuhan nilai eksport. Ini telah membawa kepada defisit akaun semasa yang lebih besar dalam tahun 1986.

Kadar inflasi di negara kita adalah rendah. Dalam tahun 1986 ia dijangka hanya satu peratus sahaja. Oleh sebab kegiatan ekonomi yang lembap, kadar pengangguran dijangka meningkat kepada 8.7 peratus berbanding 7.6 peratus dalam tahun 1985.

Kejatuhan pendapatan eksport dan juga pendapatan negara akan menjejaskan hasil Kerajaan. Pada tahun 1986, hasil Kerajaan Persekutuan dijangka berkurangan sebanyak \$2,000 juta. Selaras dengan kejatuhan tersebut, Kerajaan telah mengurangkan peruntukan perbelanjaan mengurus sebanyak \$1,400 juta. Tetapi, potongan ini adalah tidak mencukupi untuk merapatkan jurang antara hasil dengan perbelanjaan. Oleh itu, akaun semasa belanjawan akan mengalami defisit sebanyak 1.3 juta ringgit dalam tahun 1986.

Walaupun usaha-usaha gigih telah diambil semenjak tahun 1982 untuk mengurangkan perbelanjaan, defisit keseluruhan Kerajaan Persekutuan dijangka meningkat dari \$5,700 juta dalam tahun 1985 kepada \$8,900 juta dalam tahun 1986. Kedudukan kewangan Sektor Awam yang meliputi Kerajaan-Kerajaan Persekutuan dan Kerajaan Negeri serta Perusahaan Awam Bukan Kewangan atau PABK, juga dijangka merosot. Defisit keseluruhannya dianggarkan meningkat dari \$7,500 juta atau 10.5 peratus dari KNK dalam tahun 1985 kepada \$12,500 juta atau 10 peratus dari KNK dalam tahun 1986.

Defisit yang besar menggambarkan kedudukan tidak seimbang antara sumber kewangan dan perbelanjaan. Memandangkan defisit ini, kita terpaksa terus meminjam dari sumber-sumber dalam dan luar negeri. Walau bagaimanapun, pinjaman dari sumber dalam negeri akan dibuat dengan lebih berhati-hati supaya tidak menjejaskan sumber-sumber yang diperlukan oleh pihak swasta. Kerajaan juga akan mengawal pinjaman luar sektor awam memandangkan jumlah pinjaman luar negeri adalah tinggi, iaitu sebanyak \$40,000 juta.

Defisit yang besar menggambarkan kedudukan tidak seimbang di antara sumber kewangan dan perbelanjaan. Memandangkan defisit ini, kita terpaksa terus meminjam dari sumber-sumber dalam dan luar negeri. Walau bagaimanapun, pinjaman dari sumber dalam dan luar negeri akan dibuat dengan lebih berhati-hati supaya tidak menjejaskan sumber modal yang diperlukan oleh pihak swasta. Kerajaan juga akan mengawal pinjaman luar sektor awam memandangkan jumlah pinjaman luar negeri adalah tinggi, iaitu sebanyak \$40,000 juta.

...5/-

Masalah-masalah ekonomi yang kita hadapi memerlukan masa untuk diatasi. Yang paling penting ialah bagi kita menentukan arah haluan yang harus diambil dalam beberapa tahun ini untuk menggalakkan pertumbuhan ekonomi dengan sederhana dan stabil. Selaras dengan hasrat ini, Strategi Belanjawan tahun 1987 bertujuan untuk:

- i) Mengurangkan peranan sektor awam dalam ekonomi dan memperkukuhkan kedudukan kewangan negara.
- ii) Menggalakkan pertumbuhan eksport, serta mengurangkan import untuk memperbaiki Imbangan Pembayaran; dan
- iii) Memperbaiki suasana pelaburan untuk memperkembangan pelaburan swasta dan meningkatkan keyakinan pihak swasta.

Langkah-langkah untuk memperkukuhkan Pungutan Hasil

Bagi tahun 1987, hasil Kerajaan Persekutuan diramalkan berkurangan lagi sebanyak 5.9 peratus, iaitu dari \$19,158 juta dalam tahun 1986 kepada \$18,021 juta. Hasil-hasil cukai dijangka jatuh dengan banyaknya kerana harga barangan yang rendah dan pendapatan yang berkurangan. Memandangkan keadaan sekarang, pengenalan cukai-cukai baru akan melembapkan lagi kegiatan perniagaan. Oleh itu, untuk belanjawan kali ini, saya tidak bercadang membuat perubahan besar dalam cukai. Sebaliknya, perubahan-perubahan yang dicadangkan adalah pada keseluruhannya bertujuan menggalakkan kegiatan ekonomi dan untuk meningkatkan pungutan hasil, khususnya dengan mengurangkan pengecualian ke atas cukai-cukai yang ada sekarang. Oleh itu, saya mencadangkan langkah-langkah seperti berikut:-

Skim potongan untuk pungutan cukai pendapatan

Pada masa ini, pekerja-pekerja di Semenanjung Malaysia membayar cukai pendapatan mereka sama ada dengan sukarela menerusi skim potongan bulanan atau membayar sekaligus dalam masa 30 hari, selepas menerima taksiran cukai. Di Sabah dan Sarawak, potongan bulanan untuk cukai pendapatan pekerja-pekerja memang dibuat sekarang ini.

Untuk memperbaiki sistem pungutan cukai pendapatan dan mensekukan peraturan ini di seluruh negara, adalah dicadangkan skim potongan cukai bulanan diwajibkan jika jumlah cukai yang kena dibayar melebihi 500 ringgit untuk mana-mana tahun taksiran. Cadangan ini akan menghasilkan sistem pungutan cukai yang lebih berkesan dan mengurangkan jumlah tunggakan cukai pendapatan.

...6/-

Kajian semula pengecualian cukai pendapatan

Pada masa ini, pengecualian cukai yang meluas diberi kepada pendapatan yang diterima oleh perbadanan institusi dan organisasi. Memandangkan kehilangan hasil yang besar kepada Kerajaan, adalah dicadangkan supaya pengecualian cukai yang diberi tidak meliputi pendapatan dividen dan cukai pembangunan. Selain dari itu, senarai perbadanan, organisasi dan institusi di bawah Bahagian II, Jadual 6, Akta Cukai Pendapatan 1967 yang dikecualikan daripada cukai pendapatan akan disemak semula. Hanya institusi yang layak sahaja akan diberi pengecualian dan diwartakan.

Saya sedar ada banyak institusi dan pertubuhan yang sekarang ini diberi pengecualian cukai, mungkin tidak berpuas hati dengan kajian semula ini. Saya ingin memberi jaminan bahawa tujuan kajian semula ini ialah untuk mengemaskini senarai yang sedia ada oleh kerana beberapa institusi dan pertubuhan yang disenaraikan sekarang mungkin tidak lagi berkelayakan untuk mendapatkan pengecualian memandangkan corak kegiatan mereka telah berubah.

Beberapa buah daripadanya mungkin juga telah tidak bergerak lagi. Kajian semula ini akan dibuat dengan teliti untuk menentukan institusi-institusi, dan pertubuhan-pertubuhan yang benar-benar layak terus mendapat pengecualian. Saya juga sedar bahawa badan-badan ini memainkan peranan penting dalam aktiviti-aktiviti sosial dan kemanusiaan.

Peruntukan Belanjawan 1987

Ahli-Ahli Yang Berhormat, seperti yang saya nyatakan tadi, kedudukan ekonomi antarabangsa dan ekonomi negara telah merosot. Ini telah menjejaskan hasil negara.

Dengan itu, saya mencadangkan sejumlah \$27,412 juta diperuntukan untuk Belanjawan 1987. Daripada jumlah ini, sebanyak \$20,739 juta atau 76 peratus, adalah bagi Perbelanjaan Mengurus dan \$6,673 juta atau 24 peratus, bagi Perbelanjaan Pembangunan, Peruntukan yang dicadangkan ini adalah berkurangan sebanyak \$3,400 juta atau 11 peratus lebih rendah daripada Anggaran Belanjawan 1986.

...7/-

Perbelanjaan Mengurus

Peruntukan Perbelanjaan Mengurus Tahun 1987 yang dicadangkan telah dikurangkan sebanyak \$1,215 juta atau enam peratus lebih rendah dari peruntukan Belanjawan 1986. Kira-kira 38 peratus, atau \$7,812 juta, adalah bagi bayaran gaji dan 29 peratus, atau \$5,973 bagi Bayaran Hutang. Peruntukan yang lebih besar dari bayaran gaji adalah disebabkan oleh penyelarasan gaji pekerja-pekerja Kumpulan C dan D dan pengambilan lebih ramai guru.

Perbelanjaan bagi Perkhidmatan dan Bekalan yang termasuk perbelanjaan pengangkutan dan perjalanan, sewaan, pembelian barang-barang dan perbelanjaan penyelenggaraan akan dikawal dengan lebih ketat lagi. Oleh itu peruntukan tahun 1987 bagi tujuan ini akan dikurangkan sebanyak 27 peratus. Begitu juga, peruntukan bagi Pemilikan Harta Modal terutama pembelian alat-alat kelengkapan akan dikurangkan sebanyak 61 peratus.

Akaun Semasa

Walaupun perbelanjaan mengurus telah dikurangkan akaun semasa Kerajaan Persekutuan bagi tahun 1987 dijangka menunjukkan defisit sebanyak \$2,718 juta. Ini adalah kerana kejatuhan yang besar dalam kutipan hasil, iaitu sebanyak \$1.1 ribu juta yang dijangkakan tahun hadapan.

Defisit akaun semasa mungkin berterusan untuk jangka masa yang lama. Keadaan ini tidak boleh dibiarkan berlanjutan. Tindakan-tindakan perlu diambil segera untuk mengurangkan defisit ini dan seterusnya menghapuskan sama sekali selewat-lewatnya pada tahun 1989. Kerajaan juga akan mengambil langkah untuk mengurangkan defisit keseluruhan Belanjawan Kerajaan Persekutuan. Sesuai dengan hasrat ini, saya mencadangkan langkah-langkah berikut dilaksanakan:

a) Kadar faedah ke atas pinjaman perumahan dan pinjaman kereta akan dinaikkan dari empat kepada enam peratus. Kenaikan kadar ini akan juga dikenakan kepada anggota-anggota pentadbiran. Kadar ini akan dikenakan atas pinjaman baru dan yang sedia ada. Walau bagaimanapun, kakitangan dalam kategori D akan dikecualikan daripada kenaikan ini.

b) Syarat-syarat kelayakan mendapat pinjaman perumahan kerajaan yang lebih ketat akan dilaksanakan untuk mengurangkan beban kewangan. Syarat-syarat ini meliputi pegawai-pegawai kerajaan dan juga anggota-anggota pentadbiran dan berkuatkuasa dengan serta-merta. Dalam hubungan ini terdapat khabar-khabar angin bahawa kerajaan akan membekukan skim pinjaman perumahan, khabar-khabar angin tersebut adalah tidak berasas dan tidak bertanggjawab.

...8/-

c) Beberapa jenis yuran baru akan dikenakan dan yuran yang sedia ada akan dinaikkan. Pada masa sekarang, kerajaan menyediakan beberapa perkhidmatan dengan percuma, ataupun dengan bayaran minimum. Ini telah menyebabkan penyalahgunaan dan pembaziran. Yuran dan pembayaran untuk rawatan pesakit luar termasuk ubat-ubatan dan rawatan hospital akan dikenakan atau dinaikkan. Walau bagaimanapun, golongan yang berpendapatan rendah akan terus diberi rawatan percuma.

d) Beberapa agensi yang mempunyai pentindihan fungsi akan digabungkan bagi meningkatkan kecekapan kerja dan menjimatkan kos pengurusan.

e) Bilangan pekerja sektor awam akan dikurangkan melalui persaraan yang lebih awal, penempatan semula kakitangan yang berlebihan dan menghapuskan jawatan yang tidak diperlukan. Pada masa ini, saiz perkhidmatan awam terlalu besar.

f) Bilangan dan saiz perwakilan diplomatik kita dan lain-lain pejabat di luar negeri akan dikaji untuk menjimatkan perbelanjaan. Mana-mana perwakilan yang tidak perlu akan ditutup.

g) Proses pengswataan akan dikaji semula dan perubahan-perubahan akan dibuat di mana perlu untuk menjadikannya lebih mudah dan berkesan. Kerajaan akan mengenalpasti projek-projek dan perkhidmatan-perkhidmatan yang boleh diswastakan. Sehubungan dengan ini, kerajaan bersedia untuk menswastakan Keretapi Tanah Melayu dengan memajakkannya pada harga nominal sebanyak satu ringgit kepada mana-mana pihak yang sanggup menjalankannya secara komersil, tertakluk kepada syarat-syarat yang akan dirundingkan.

h) Skim biasiswa akan diubahsuai. Peruntukan untuk tujuan ini akan diubah supaya 20 peratus sahaja dikeluarkan sebagai biasiswa dan 80 peratus adalah di dalam bentuk pinjaman. Kerajaan juga sedang mengkaji skim membiayai pinjaman pelajaran melalui sistem bank. Langkah-langkah ini perlu kerana pada masa ini kerajaan memperuntukan kira-kira \$800 juta sebagai biasiswa dan pinjaman.

i) Pekerja-pekerja sektor awam yang baru dan mereka yang belum ditempatkan dalam jawatan berpencen akan dikehendaki mencarum kepada Kumpulan Wang Simpanan Pekerja. Mereka dalam golongan ini tidak akan diberi pencen. Dalam jangka panjang, langkah ini akan dapat mengurangkan beban pembayaran pencen dan ganjaran yang pada masa sekarang berjumlah \$846 juta setahun.

Prospek Bagi 1987

Pertumbuhan di negara-negara perindustrian diramalkan meningkat sedikit pada tahun 1987, iaitu tiga peratus. Walau bagaimanapun, kadar pertumbuhan ini adalah sederhana dan tidak dapat memberi galakan yang cukup terhadap pertumbuhan di negara-negara membangun.

...9/-

Oleh yang demikian, saya menganggarkan pengeluaran sebenar di dalam ekonomi kita akan berkembang sebanyak lebih kurang satu peratus dalam tahun 1987. Harga pengguna dijangka tidak mengalami peningkatan yang besar dan kadar inflasi adalah di dalam lingkungan satu peratus, iaitu sama dengan kadar inflasi dalam tahun 1986. Akaun semasa Imbangan Pembayaran dijangka menunjukkan sedikit pemulihan sungguhpun defisit masih kekal di tahap yang tinggi, iaitu sebanyak \$3,000 juta. Kedudukan rizab luar dijangka mencukupi untuk membiayai import untuk lebih kurang tujuh bulan.

Langkah-langkah tegas belanjawan yang saya cadangkan dan yang akan dilaksanakan di sepanjang tahun hadapan akan memperbaiki kedudukan kewangan kerajaan. Defisit keseluruhan sektor awam dijangka akan bertambah baik, iaitu turun kepada \$10,500 juta atau 15.9 peratus daripada KNK. Manakala defisit keseluruhan Kerajaan Persekutuan dijangka berkurangan kepada \$8,300 juta atau 12.5 peratus daripada KNK, Kedudukan kewangan

Kerajaan Persekutuan yang lebih baik ini adalah hasil daripada pengurangan dalam Perbelanjaan Pembangunan. Walau bagaimanapun, akaun semasa akan mencatatkan defisit yang besar, iaitu sebanyak \$2,700 juta. Ini adalah satu kedudukan yang membimbangkan. Kita tidak akan membiarkan defisit seperti ini berterusan.

Ramalan untuk tahun 1987, adalah berasaskan kepada harga minyak ke paras 13 dolar Amerika setong. Harga minyak mungkin merosot ke paras 10 dolar setong, jika negara-negara Opec tidak berjaya menghasilkan strategi yang dapat menstabilkan harga. Sekiranya ini berlaku, pendapatan kita akan terus merosot dan defisit dalam akaun semasa kerajaan dan imbalan pembayaran akan menjadi lebih besar. Langkah-langkah yang perlu diambil untuk mengurangkan defisit ini termasuklah mengurangkan lagi elaun-elaun, memotong gaji dan pembuangan kerja.

Setiap golongan rakyat hendaklah sanggup berkorban demi memperkukuhkan kedudukan ekonomi negara. Kerajaan mengamalkan Konsep Kepemimpinan Melalui Teladan. Para menteri dan timbalan menteri telah pun memotong gaji mereka bermula dari bulan Ogos 1982. Pengorbanan perlu bermula dengan pemimpin-pemimpin negara dan pegawai-pegawai kanan kerajaan. Tidak ada gunanya pemimpin-pemimpin negara menggesa rakyat untuk berkorban, jika mereka sendiri tidak membuat apa-apa. Oleh itu saya mencadangkan langkah-langkah tambahan seperti berikut:

...10/-

a) Elaun-elaun dan keistimewaan menteri-menteri, timbalan-timbalan menteri dan lain-lain anggota pentadbiran dikaji semula dengan tujuan untuk mengurangkan atau memansuhkannya. Elaun-elaun kerajaan dan perumahan serta elaun-elaun perjalanan rasmi akan dikurangkan antara 10 hingga 20 peratus. Semua elaun yang sekarang ini dibayar semasa perjalanan percutian, akan dimansuhkan. Kerajaan hanya akan membayar tambang perjalanan untuk bercuti bagi para menteri, timbalan menteri dan isteri atau suami mereka sahaja. Langkah-langkah ini berkuatkuasa serta-merta.

b) Pada masa sekarang, ada ahli-ahli politik dan segolongan pegawai kerajaan yang menerima ataupun mungkin layak menerima lebih dari satu pencen dari kerajaan. Kerajaan akan mengenakan cukai 100 peratus ke atas pencen kedua dan seterusnya yang diterima oleh mereka.

c) Elaun-elaun kerajaan dan perumahan pegawai-pegawai kerajaan di dalam tingkatan tertinggi akan dikurangkan sebanyak 10 peratus.

d) Elaun perjalanan untuk pegawai-pegawai kerajaan semasa menjalankan tugas-tugas rasmi akan dikurangkan. Pada masa ini, ada terlalu banyak perjalanan yang tidak perlu. Ini akan dikawal. Kerajaan juga akan mengurangkan perbelanjaan bagi menghadiri persidangan dan seminar di luar negeri.

Saya telah berterus terang dalam memberikan gambaran sebenar mengenai kedudukan ekonomi negara. Ekonomi negara sedang mengalami satu tempoh pertumbuhan yang lembab. Kadar pengangguran semakin meningkat. Pendapatan purata rakyat telah turun dua tahun berturut-turut. Gaya hidup kita pula, tidak selaras dengan pendapatan yang semakin merosot. Sebenarnya, kita masih belum menyesuaikan diri dengan penurunan pendapatan ini. Kedudukan kewangan kerajaan juga, membimbangkan. Kita tidak boleh lagi berhutang dengan banyak tanpa menjejaskan kedudukan kewangan negara.

Kerajaan Barisan Nasional, telah diberikan mandat yang besar oleh rakyat untuk terus memimpin negara ini. Tanggungjawab utama kerajaan ialah untuk memulihkan kedudukan ekonomi negara. Mandat yang diberikan oleh rakyat telah menguatkan lagi azam kerajaan untuk mengambil langkah-langkah yang tegas dalam memenuhi tanggungjawab ini. Saya juga ingin menekankan sekali lagi bahawa kerajaan akan mengambil langkah-langkah yang lebih tegas, jika kedudukan ekonomi semakin merosot.

Belanjawan kali ini, mencadangkan beberapa langkah yang mungkin tidak popular dan membebankan pihak-pihak tertentu. Tetapi langkah-langkah ini adalah perlu. Kita tidak boleh berbelanja lebih dari pendapatan dan menggadaikan masa depan negara. Belanjawan ini mencadangkan langkah-langkah yang lebih tegas bagi memperkukuhkan kedudukan kewangan sektor awam dan mengurangkan saiz sektor awam. Langkah-langkah juga sedang diambil untuk menggalakkan pertumbuhan sektor swasta, terutama dalam bidang industri yang berasaskan eksport, pembinaan rumah kos rendah dan pembukaan tanah-tanah baru untuk pertanian.

Pemimpin-pemimpin politik, pegawai-pegawai kerajaan, sektor swasta, kesatuan sekerja dan setiap golongan rakyat di kota dan di desa, semuanya perlu berganding bahu dalam usaha memulihkan ekonomi negara. Nilai sesebuah negara ini dapat ditonjolkan dari bagaimana ia menghadapi kesulitan. Kerajaan Barisan Nasional akan meningkatkan usaha bagi membina sebuah negara yang lebih makmur, bersatu padu dan disegani. Dengan fahaman, pengorbanan dan sokongan semua pihak dan kekuatan iman, Insya-Allah kita akan berjaya mengatasi semua masalah.

-ooo000ooo-